

Tupa avatangiisinillu tupatorfiunngitsunik isumannaarineq kiisalu tupanik nioqqutissat nalunaaqutserneqartarneri pillugit Inatsisartut peqqussutaannut siunnersuut.

(Ilaqutariinnermut Peqqissutsimullu Naalakkersuisoq)

Akissuteqaat

Aapassaaneerinnineq

Ataatsimiititaliaq qutsavigaara peqqussutissatut siunnersuut oqaluuserisimmagu.

Avatangiisit tupatorfiunngitsut pillugit aalajangersakkani pillaatissiisinaanermut periarfissaqanngilaq, taamaaliortoqassagaluarpas Namminersornerullutik Oqartussat, kommunit minnerunngitsumillu politiit allaffissornikkut aningaasartuutaat qaffarujussuartaassammata. Taassuma saniatigut unnerluutigisaqattaanneq pilersinneqartussaavoq.

Nakkutilliisussanik pilersitsinermut aningaasartornissaagaluamut taarsiullugu Namminersornerullutik Oqartussani Isumannaallisaanermut ataatsimiititaliaq Naalakkersuisut attavigilersaarpaat, avatangiisit pujortarfiunngitsut pillugit aalajangersakkat malinnissaat sulinermi tunngavissiiinikkut qulakkeerneaqqullugit. Unioqutitsinerit pisortaqatigiinnut nalunaarutigineqarsinnaassapput, taakkulu aaqqiisoqarnissaa isumagisassavaat. Isumannaallisaanermut ataatsimiititaliap atorneqarnerata aalajangersakkanik malinninnissamut iluaqutaanissaa Naalakkersuisut naatsorsuutigaat, taamaattumik pillaatissiinissamut Inatsisartut periarfissarsiornissaat pisariaqanngilaq.

Siumup oqaaseqartuata nalunaarutigaa tupatornerup kingunerisaanik nappaatigineqalersartut katsorsarnerannut peqqinnissaqarfiup aningaasartuutissatut missingersuutaanit 300 mio koruunit missaat atorneqartartut. Kisitsisit taakku Ilaqutariinnermut Peqqissutsimullu Ataatsimiititaliap isumaliutissiisutaanit ilanngunneqarsimapput "misissuinerit nutaat"-tut innersuunneqarsimallutik. Kisitsit taanna eqqunngilaq, tupatornerullu kingunerisaanik nappaatit katsorsarneqartarnerannut aningaasartuutaasartut misissorneqarsimanerannik ilisimasaqanngilanga.

Naalakkersuisullu inassutigissavaat peqqussutissatut siunnersuutip taamatut iluseqartillugu akuersissutigineqarnissaa.